

DECLARATION

DV ROY, POVR

3847

la Réünion à son Domaine, &
confiscation des biens des Ducs de
Neuers, de Vendosme, de Mayen-
ne, Marechal de Buillon, Marquis
de Cœuure, & President le lay.

Verifiée en Parlement le 16. Mars, 1617.





A PARIS,

Par FED. MOREL, & P. METTAYER,
Imprimeurs ordinaires du Roy.

M. DC. XVII.

Avec Privilege de sa Majesté.





L O V Y S par la grace de Dieu, Roy de France & de Navarre, A nos amez & feaux Conseillers les genstenans nostre Cour de Parlement à Paris, Salut. L'inexecution des Loix ayant tousjours esté la ruine des Empires, & au contraire l'obseruation d'icelles, leur grandeur, nous fait apprehender l'un, & souhaïter l'autre : Mesmement en ce siecle où la desobeïssance semble n'estre plus reputée à crime, quoy que ce soit celuy qui merite plus rigoureux chastiment. C'est pourquoy desirant que nos lettres patentes, & declarations faictes contre les Ducs de Nevers, de Vendosme, de Mayenne, Ma-

reschal de Buillon, Marquis de Cœu-
ure, & President le Iay, sortent leur
plein & entier effect: & que suiuant
icelles il soit procedé contre eux, leur
memoire & posterité, comme crimi-
nels de leze Majesté, & perturbateurs
du repos public, selon la rigueur de
nos ordonnances: Les ayant en outre
par icelles nosdites lettres declarez
descheuz de tous honneurs, grades, di-
gnitez, charges, pensions & appointe-
mens qu'ils possedoient & tenoient de
nous, ou des Roys nos predecesseurs,
puisque dans le delay que nous leur
auons donné pour recognoistre leurs
fautes, ils ne nous sont venuz trouuer
pour s'aquiter personnellement entre
nos mains, de ce qui estoit de leur de-
voir. Ce que nous leur aurions accor-
dé, afin de leur donner encores moyen
de se resoudre à receuoir plustost les
effects de nostre bonté (comme ils

34

ont fait par le passé) que la force & rigueur de nos armes, & de nostre Iustice: Et qu'au lieu de satisfaire à ce qui estoit de nostre volonté, & de leur deuoir, ils ont non seulement renforcé leurs garnisons: mais bien dauantage se sont à force ouuerte mis à la campagne avec vn extreme mespris de nostre authorité, à la foule & oppression de nos pauvres subjects. A ces causes, & pour empescher la continuation de telles violances, de l'aduis de la Royne nostre tres-honoree Dame & Mere, d'aucuns Princes, Ducs, Pairs, Officiers de nostre Couronne, & principaux de nostre Conseil; Nous vous mandons, ordonnons, & tres-expressement enjoignons par ces presentes signées de nostre main, que conformement à nosdites lettres patentes & declarations, vous ayez à réünir inseparablement à nostre Domaine, les

A iij

Duchez, Pairies, Comtez, terres & seigneuries qu'ils tiennent de nous, & de nostre Couronne: Et confisquer tous autres fiefs, terres & domaines par eux possédez en cestuy nostre Royaume, & pays de nostre obeïssance: Les fruiçts desquels nous voulons estre receuz par les Receueurs de nostredit Domaine, & par eux employez ainsi qu'il sera par nous ordonné. Voulons aussi que esdites terres, la Iustice soit rendüe à nos subjects habitans d'icelles, par nos Iuges & Officiers plus prochains, le tout à la poursuite & diligence de nostre Procureur General, & ses Substituts. De ce faire & accomplir vous auons, & à nostredit Procureur General, donné & donnons plein pouuoir, puissance, autorité, commission & mandement special par cesdites presentes: Car tel est nostre plaisir.

Donné à Paris le dixiesme iour de Mars, l'an de grace, mil six cens dix-sept. Et de nostre regne le septiesme.

Signé, LOVIS.

Et plus bas, Par le Roy.

DE LOMENIE.

Et sceillée du grand seau de cire iaune sur simple queue.

Leües, publiées & registrées, oy & ce requérant le Procureur General du Roy: Ordonne la Cour, que coppies collationnées seront enuoyées aux Bailliages & Seneschaussées de ce ressort, pour y estre leües, publiées, registrées à la diligence des Substituts du Procureur General du Roy, auxquels enjoinct la certifier d'auoir ce fait au mois. A Paris en Parlement le seiziesme Mars, mil six cens dix-sept.

Signé,

DV-TILLET.

21013